

【经文信息】大正藏第 32 册 No. 1685

八大灵塔梵赞 1 卷

No. 1685

佛说八大灵塔名号经

西天译经三藏朝散大夫试光禄卿明教大师臣法贤奉 诏译

尔时世尊告诸苾刍。我今称扬八大灵塔名号。汝等谛听。当为汝说。何等为八。所谓第一迦毘罗城龙弥憍园是佛生处。第二摩伽陀国泥连河边菩提树下佛证道果处。第三迦尸国波罗柰城转大法轮处。第四舍卫国祇陀园现大神通处。第五曲女城从忉利天下降处。第六王舍城声闻分别佛为化度处。第七广严城灵塔思念寿量处。第八拘尸那城娑罗林内大双树间入涅槃处。如是八大灵塔。重说颂曰。

净饭王都迦毘城	龙弥憍园佛生处
摩伽陀泥连河侧	菩提树下成正觉
迦尸国波罗柰城	转大法轮十二行
舍卫大城祇园内	遍满三界现神通
桑迦尸国曲女城	忉利天宫而降下
王舍大城僧分别	如来善化行慈悲
广严大城灵塔中	如来思念寿量处
拘尸那城大力地	娑罗双树入涅槃

如是八大灵塔。若有婆罗门及善男子善女人等。发大信心修建塔庙承事供养。是人得大利益。获大果报。具大称赞。名闻普遍甚深广大。乃至诸苾刍亦应当学。

复次诸苾刍。若有净信善男子善女人。能于此八大灵塔。向此生中至诚供养。是人命终速生天界。

尔时世尊复告诸苾刍。汝等谛听我今当说。游止国城及于住世。而说颂曰。

二十九载处王宫	六年雪山修苦行
五岁王舍城化度	四年在于毘沙林
二年惹里岩安居	二十三载止舍卫
广严城及鹿野苑	摩拘梨与忉利天
尸输那及憍跋弥	宝塔山顶并大野
尾努聚落吠兰帝	净饭王都迦毘城
此等圣境各一年	释迦如来而行住
如是八十年住也	然后牟尼入涅槃

佛说八大灵塔名号经

【经文信息】大正藏第 32 册 No. 1685 佛说八大灵塔名号经

【版本记录】CBETA 电子佛典 Rev. 1.7 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，日本 SAT 组织提供，北美某大德提供，
CBETA 自行扫描辨识

【其他事项】本数据库可自由免费流通，详细内容请参阅【中华电子佛典协会数据库版权宣告】
